

Pendidikan sejarah perlu lebih praktikal: TPM 030

KUALA LUMPUR, Selasa – Pendidikan sejarah dan ketatanegaraan perlu menggunakan pendekatan lebih praktikal supaya ia mudah difahami dan dihayati setiap golongan masyarakat, terutama generasi muda.

Timbalan Perdana Menteri, Datuk Seri Abdullah Ahmad Badawi, berkata golongan muda yang menjadi pewaris generasi akan datang memerlukan pendekatan lebih cangkih serta sesuai dengan kehidupan hari ini.

Beliau berkata, langkah itu perlu sejajar dengan hasrat untuk menyubur dan membentuk semangat patriotisme serta jati diri di dalam diri mereka.

“Musuh negara sentiasa berada di sekeliling kita dan anak muda yang mudah dieksploitasi menjadi sasaran utama mereka.

“Perkara ini mungkin tidak berlaku jika setiap rakyat memahami falsafah perjuangan yang didokong pemimpin dan pejuang kemerdekaan dulu,” katanya ketika merasmikan Pameran Perjuangan, Pengorbanan dan Patriotisme di Mu-

zium Negara, di sini hari ini.

Teks ucapannya dibacakan Menteri Kebudayaan, Kesenian dan Pelancongan, Datuk Abdul Kadir Sheikh Fadzir.

Pameran di ruang legar Muzium Negara yang diadakan sempena sambutan Bulan Kemerdekaan itu dibuka kepada orang ramai sejak 16 Ogos lalu hingga 28 September ini.

Ia bertujuan memaparkan semangat, perjuangan dan pengorbanan tokoh nasionalisme tempatan menentang penjajahan sehingga negara mencapai kemerdekaan, menyedarkan rakyat mengenai kepentingan perpaduan kaum bagi mempertahankan kemerdekaan seta usaha pemerintah menjadikan Malaysia negara aman dan maju.

Pada majlis itu juga, laman web rasmi Jabatan Muzium dan Antikuiti turut dilancarkan. Ia boleh diakses menerusi alamat <http://www.jma.gov.my>.

Abdullah berkata, negara akan menghadapi masalah besar jika konsep dan falsafah yang terkandung dalam Perlembagaan Persekutuan diabaikan.

Katanya, golongan yang mengabaikan perkara itu akan menggunakan cara tersendiri untuk menagih simpati rakyat bagi mengejar cita-cita memerintah negara sehingga melanggar undang-undang dan mengugut ketenteraman awam.

“Kerajaan tidak akan mengizinkan berlaku perkara yang boleh menjejaskan keselamatan negara dan ketenteraman awam.

“Kita tidak akan teragak-agak bertindak tegas berasaskan undang-undang sedia ada bagi menentukan keamanan negara terpelihara, rakyat hidup rukun dan damai serta negara terus membangun seperti dirancang,” katanya.

Beliau berkata, perjuangan memartabatkan kemerdekaan negara mesti dipupuk setiap masa dan menjadi kebanggaan setiap warga negara.

Katanya, mesej yang disalurkan dalam penerbitan khas menerusi media cetak dan elektronik atau pameran oleh institusi kerajaan mahupun swasta perlu menjurus ke arah cintakan negara dan memupuk semangat patriotisme dan nasionalisme yang tinggi.